

Script Of Morning Gojri News Bulletin 02 July 2024 at 1015Hrs

مارننگ گو جری نیوز بلیٹن مورخہ 02 جولائی 2024

یوہ آکا شوانی جموں ہے محمد مبارک ماہر تیں خبر سُنو۔

New Laws

وزیر داخلہ امت شاہ نے کہیو ہے کہ گذشتہ روز نافذ ہون والا 3 فوجداری قانون مُلک نانہہ جدید ترین فوجداری انصاف غا نظام آلے پا سے لے جا ئیں گا۔ یاہ گل اُن نے کل نویں دہلی مانہہ نامہ نگا راں سنگ گل کرتاں واں کہی۔ اُن نے کہیو کہ فوجداری انصاف غو نظام ہُن مکمل طور ور سو دیشی ہے اور آزادی تیں بعد ہندوستانی اخلاقیات مانہہ سر ایت کر گیو ہے۔ مذکورہ فوجداری قوانین ور بولتاں واں اُن نے دسیو جے یہ تیز رفتار انصاف تے متاثرین غا حقوق نانہہ یقینی بناویں گا۔ اُن نے کہیو کہ نواں قوانین مانہہ خواتین تے بچاں غے خلاف ہون والا جرائم نانہہ ترجیح دتی گئی ہے۔ اُن نے کہیو کہ نواں قوانین مانہہ ہجومی تشدد غے خلاف وی شق ویں گی۔ جموں کشمیر غا لیفٹنٹ گورنر منوج سنہا نے گذشتہ روز سرینگر مانہہ واقع پولیس غا صدر دفتر مانہہ اک منعقدہ تقریب سنگ خطاب کرتاں واں کہیو کہ ہندوستان غا ائین نے ہمیشہ انصاف، غیر جانبداری، آزادی تے یکجہتی غا اصول ور زور دتو ہے۔ اُن نے کہیو کہ جے کدیں ہم ان قوانین غی تفصیل مانہہ جان تے ہم واضع طور ور یہ سب چیز دیکھاں۔ اُن نے کہیو کہ وے کمزوراں غی حفاظت سب واسطے انصاف نانہہ یقینی بنان بارے پُر عزم ہیں۔

Parliament

گذشتہ روز پارلیمان غا دوہاں ایواناں نے لوک سبھا اور راجیہ سبھا غا سانجھا اجلاس غا سلسلہ مانہہ صدر جمہوریہ درویدی مُرمو غا خطاب ور شکریہ غی تحریک ور تبادلہ خیال کیو۔ لوک سبھا مانہہ بحث مانہہ حصو لیتاں واں بی جے پی غا رُکن پارلیمان انوراگ سنگھ ٹھاکر نے پچھلا 10 بہراں مانہہ بکھ بکھ شعباں مانہہ سرکار غی طرفوں کیا گیا کماں غی تعریف کی۔ حزب اختلاف غا رہنما راہل گا ندھی نے نیٹ امتحان مانہہ مبینہ بے ضابطگی، اگنیویر سکیم، منی پور مانہہ بد امنی، نوٹ بندی، بدھتی وی مہنگائی، کساناں گا مسئلہ غے نال نال دوجا معاملہ وی چایا۔ راہل گا ندھی نے اپنی تقریر غے دوران اک مخصوصی برادری ور تبصرو کیو۔ جس ور وزیر اعظم نریندرمو دی تے وزیر داخلہ امت شاہ نے اعتراض کیو۔ اس ور سپیکر اوم برلا نے کہیو کہ پارلیمان ارکان نانہہ بولتاں واں ایوان غو تقدس برقرار رکھنو چاہیے۔ اس مسئلہ ور بعد مانہہ راہل گا ندھی نے واضع کیو کہ اُن غو بیان کسے خاص برادری غے خلاف نہیں تھو بلکہ اُس غو رُخ بی جے پی آلے پاسے تھو۔

Army Chief

گذشتہ روز فوجی سربراہ جنرل اوپندرہ دوی ویدی نے مشرقی لداخ مانہہ چین غے نال چل رہیا سرحدی تنازعہ غا سلسلہ مانہہ بولتاں واں کہیو کہ بھارتی فوج مُلک نانہہ درپیش تمام موجودہ تے مستقبل غی حفاظتی للکاراں غو مقابلو کرن واسطے اہل اور تیار ہے۔ 10 عشاریہ 3 ملین مضبوط فوج غی کمان سنبھال تیں بعد جنرل دوی ویدی نے کہیو کہ فوج فضائیہ اور بحریہ غے ہشکار ہم آہنگی نانہہ یقینی بنان غا سلسلہ مانہہ کم کرنو اُن غی ترجیحات مانہہ شامل ہے۔ رائسینا پہاڑیاں مانہہ جنوبی بلاک مانہہ گا رڈ آف اُنر غو معائنو کرن توں بعد نامہ نگاراں سنگ گل کرتاں واں اُن نے کہیو کہ فوج نانہہ منفرد کا روائی

للكاراں غو سامنو ہے اور ایسا خطراں واسطے تیار رہن غے نال نال فوجیاں نانہ جدید ہتھیاراں تیں لیس کرنو بہت ضروری ہے۔

Amarnath

گذشتہ روز مُلک پھر تیں آیا 23 ہزار یا تریاں نے شری امرناتھ گُفہ غا درشن کیا ہیں جد کہ بھگوتی نگر جموں غا یا تری نواس تیں ننوان پہلگا تے بالتال واسطے 6 ہزار 5 سو 37 یا تریاں ور مشتمل اک تازو جتھو 265 نکئی بڑی گڈیاں ور تگڑا حفاظتی بندوبست مانہہ اج نکئی لو روانہ ہوؤ ہے۔ ذریعاں غے مطابق کل شام تک مذکورہ گُفہ غا درشن 23 ہزار 4 سو 37 یا تریاں نے کیا۔ بمالیہ مانہہ واقعہ 3 ہزار 8 سو 88 میٹر اُچی گُفہ غا درشن پچھلا 3 تہاڑاں مانہہ 51 ہزار 9 سو 81 لوکاں نے کیا ہیں۔

Not to Visit

ضلع پو نچھ غی تحصیل مینڈھر علاقہ مانہہ قبضہ لکیر نال لگتا جنگلاں مانہہ رات 9 بجے تیں سویرے 4 بجے شال یا کمبل وغیرہ بغیر فوج یاہ پولیس انتظامیہ غی اجازت تیں لے غے نہ جا ئیں۔ اس ضمن مانہہ ایس ڈی ایم مینڈھر نے فوج غی طرفوں حفاظتی اقدامات غا سلسلہ مانہہ چایا معاملہ غا سلسلہ مانہہ اک حکم نامو جا ری کیو ہے۔ اس سلسلہ مانہہ پچھلے ہفتے فوج نے مینڈھر علاقہ مانہہ قبضہ لکیر غے نیڑے 3 بنداں نانہہ حراست مانہہ لیو تھو۔

PBPB Kathua

ڈپٹی کمشنر کٹھوہہ ڈاکٹر راکیش منہاس نے کل آئی سی ڈی ایس غا فلیڈ فنکشنز واسطے ”پوشن بھی پڑھائی بھی“ اقدامات غے تحت تربیتی پروگراماں غا اک سلسلہ غو افتتاح کیو۔ اس اقدام غو مقصد کا رکنان نانہہ جامع علم تے ضروری مہارتاں تیں آراستہ کرنو ہے۔ جہیڑا بچاں غی ابتدائی بہراں مانہہ پرورش با رے ضروری ہیں۔ اس موقع ور خطاب کرتاں وان ڈی سی نے پروگرام غا بنیا دی مقصد ور زور دتو جن مانہہ صلاحیت غی تعمیر تے پُر مانہہ بابدو شامل ہیں۔ مذکورہ تربیتی پروگرام آنگن آوڑی کا رکنان نانہہ با اختیار بنان غی کوشش غو اک اہم حصو ہے۔

Kissan SAMPARK

مجموعی ذراعت با رے ترقی غا پروگرام غے تحت کل ضلع ریا سی غا 12 بلاکاں غی بکھ بکھ پنچائیتاں مانہہ کسان سمپرک ابھیان 3.0 شروع کیو گیو۔ کسان سمپرک ابھیان 3.0 غو مقصد مجموعی ذراعت غا ترقیاتی پروگرام با رے بیداری پیدا کرنو تے نال ہی کا شتکاری برادری غی بھلائی بہتری واسطے ایچ اے ڈی پی غے تحت منصوباں ور عمل درآمد نانہہ تیز کرنو ہے۔
